

## 每週經課朗誦經文(巴克禮台語漢字)2014/10/26

### 共同經課 - 1 申命記三十四章一節~十二節

1 摩西對摩押平洋上尼波山，上彼個及耶利哥相對的毗斯迦山頭。耶和華互伊看基列全地直到但，2 拿弗他利全地，以法蓮、瑪拿西的地，猶大全地到西海，3 南方及叫做棗樹城的耶利哥山谷的平洋，到瑣珥。4 耶和華對伊講：「此個地就是我對亞伯拉罕、以撒、雅各咒誓，講：『我欲賞賜你的後裔的。』今我互你親目看見，總是你袂得著過去到遐。」5 耶和華的奴僕摩西就死佇遐，佇摩押的地，照耶和華所講的。6 耶和華埋葬伊佇摩押地、伯毗珥相對的山谷，到今仔日無人知伊的墓。7 摩西死的時一百二十歲；目矙無花，精力無衰退。8 以色列人佇摩押平洋為著摩西哀哭三十日，為著摩西憂悶哀哭的日滿啦。9 嫩的子約書亞得著智慧的神充滿；因為摩西曾按手佇伊的頂面，以色列人就聽趁伊，照耶和華所命令摩西的來行。10 後來以色列中無閣興起先知親像摩西。伊是耶和華面對面所識的。11 照耶和華差伊佇埃及地對法老及伊攏總的人臣，以及伊的全地所行逐樣的神蹟奇事，12 也照大權能的手，大通驚的事，就是摩西所行佇以色列眾人的目矙前的。

### 共同經課 - 2 詩篇九十篇一節~六節，十三節~十七節

1 〔上帝的人摩西的祈禱。〕主啊，你逐世代做阮倚起的所在。2 諸個山猶未生出，地及世界你猶未造成，對永遠到永遠，你是上帝。3 你互人歸土，講：恁世間人著越倒轉。4 因為在你看，一千年親像已經過去的昨日，閣親像暝間的一更。5 你親像用大水給in流去；in親像睏一醒。早起時，in親像發生的草，6 早起時發生茂盛，下昏時收割就枯焦。13 耶和華啊，欲到底時呢？求你倒轉，為著你的奴僕來回心。14 求你早起時用你的慈愛互阮滿足，互阮一世人歡喜快樂。15 求你照你苦楚阮的日，照阮抵著患難的年，互阮歡喜。16 願你的所做對你的奴僕顯現；你的榮光對in的子孫顯明。17 願主——阮的上帝的美妙踎佇阮的頂面。願你堅固阮的手所做的工；阮的手所做的工，願你堅固伊。

### 共同經課 - 3 帖撒羅尼迦前書二章一節~八節

1 因為兄弟，恁家已知阮前到恁中間嘔是空空。2 獨獨佇腓立比已經代先受苦抵著凌辱，照恁所知的；阮佇多多爭戰的中間，倚靠咱的上帝，得著好膽對恁講上帝的福音。3 因為阮的勸勉嘔是出佇差謬，嘔是出佇無清氣，也嘔是用奸詐。4 就是阮互上帝驗過，才用福音託仗阮，阮就照按呢來講，嘔是親像互人歡喜的，就是互驗阮的心的上帝歡喜。5 因為阮攏未曾用諂媚的話，照恁所知的；也無用妝飾來遮蓋貪心，上帝做干證。6 阮做基督的使徒，雖然通教人敬重阮，總是嘔曾對人求榮光，也無對恁也無對別人；7 阮就是溫柔佇恁中間，親像奶母育家己的子兒。8 親像按呢阮因為戀慕恁，就嘔若上帝的福音，連家己的生命也歡喜互恁，因為恁是阮所疼痛的。

### 共同經課 - 4 馬太福音二十二章三十四節~四十六節

34 法利賽人聽見伊已經塞密撒都該人的嘴，就相及聚集。35 其中一人做教法師的，試伊，問講：36 「先生啊，律法中甚麼誠最大？」37 伊給伊講：「你著盡心、盡性、盡意疼主——你的上帝。38 此個誠是大的，也是頭一個。39 第二個也相親像，是講，你著疼厝邊親像家己。40 此二條誠是全律法及先知的總根頭。」41 法利賽人聚集的時，耶穌問in講：42 「論基督，恁拍算怎樣？伊是是誰的後裔？」in給伊講：「是大衛的。」43 伊給in講：「按呢，就大衛互聖神感動，怎樣稱伊做主啊，講：44 主給我的主講：坐我的大旁，聽候我將你諸個對敵下佇你的腳下。45 大衛既然稱伊做主，就基督怎樣做伊的後裔啊？」46 無人會應伊一句。對彼日，也無人敢閣問伊。